

宋文憲公全集

冊
七

宋文憲公全集卷四十八

葉深道哀辭

烏傷葉君深道字逢原沈確而有文生與予友也死則哀之以辭

綢山孤張華川瀦水動溶漾元精煦嫗育裔蟬聯爲里望回鑾有疏輓漕有猷效忠亮君出其後不續遺緒宜炫煥胡爲纏延決瘍潰疹閼難鬯長始知學優游厭飫敢虛曠朝蒐莫適會其肯綮搯其肮業成歿畜如矢藏箠弓入轅室廬枵然有衣一襲履一量不隨游塵上下鼓舞相頡頏嗟予蹇傴感今思古徒慨忼辟諸豫章絜之百圍逢哲匠愧彼紛紜妄厠疊洗忝益益抽關啓鑰浸漬薰蒸予儻相天胡難知木邪制土病腫脹叫呶輾轉晝夜變幻熱以瘡疾勢漸革魂氣隨風恣飛颺楔齒綴足髻笄縵中禮是傍善人宜壽卒就黃墟永淪喪相此小夫露牙揚己學豪放手足胡越豈知五倫爲世障胡不顛蹶反使亂真曰趨妄嗚呼噫嘻君今逝矣予焉仗制服緦麻存慕音容哭相向元雲漫漫涼風瀟瀟吹總帳我詞之哀君知不知倍悲愴

郭淵哀辭

郭淵字濟川六人唐汾陽王子儀胤也宋季羣盜起淵聚族共保若一障曰蔡堡六人依焉天下已定民爲占籍吏撓之民見縣有爲丞相客者無敢呵相教爲丞相奴淵謂民民賤王民也奴重人奴也使世世爲人奴與王民孰愈民愧

而止後樹吏吏務休息民而奴客困皆來謝曰微君幾不免大德末淮大饑淵作饘粥食之生者甚夥是時人多粥子自救淵取困甚者假子養之十餘年皆爲娶婦居數歲大穰一朝縱之曰若事吾良苦及時歸毋久留爲也皆涕泣曰公生我今驅我安之願留終公身淵曰毋悲後吾子孫不省將以汝爲奴卒縱之人有貰酒飲西家者已醉而出遺所贖金於門淵適見藏弄俟之明日遺金人從西家求金西家誠不知怒以爲欺求之急西家怒益閉其人困卽欲自剄方爭淵聞之遽出呼其人與之所遺金人皆驚始保蔡堡羣少年共劫一人將殺之淵呵曰此何罪至殺羣少年曰此疑狙伺爲讎而將襲我故殺之耳曰吾所爲相保以生誠惡死也今疑而殺人禍將及羣少年怒淵私計奪之力且追殺之乃曰吾代之贖何如羣少年喜遂免之後至昇昇市中有戴粒妝盤鬻於市者遇淵置戴盤叩頭泣曰今日遇公天也幸臨過我我有母皆願見公謝淵固辭假以爲誤去之市上老人歎曰世稱長者此真是耶初六界北邊民習兵少文淵與父諗以詩書俎豆爲業人慕之多化者至今六多儒淵旣卒其孫言抱李孝光所造墓文請濂哀以辭濂未及爲言客死豫章可悲也始言與濂游語及當世輒瞑目嚼齒語皆驚人聽者掩耳避去及操筆綴辭則海蜃吐樓而芝罘翠輦隱見空濛閒可怖愕言誠奇男子濂故刪孝光文爲辭哀淵且附見言事以見可哀不特淵也辭曰

有開其先熙以申有紹其後文以彬何遏其施祿以屯

哭張教授父子辭

濂同縣張公繼祖力學而尚志操少讀魯仲連傳見其排難解紛歎曰士當如是而已大德中縣有桀黠吏挾重辟害民民懦怯莫敢觸其鋒公直之部使者時吏方抱案在庭公面疏其奸卒置於法延祐閒郡上公才行署雙溪書院山長考第成遂調瀏陽州學教授公爲復侵疆稽其步畝刻石學宮會守貳闕太府檄公攝州事時歲薦祲道殣相枕藉方下令勸分公爲設方略使持券者左入受粟者右出竟事帖帖無譁居二年以大父喪棄官歸卒其子道生力學如其父屢應進士舉不利困頓殊甚適余觀以監察御史行部浙東觀同舍生也召見相勞苦薦爲武夷書院山長未幾亦卒初濂年幼時見公公卽相器重與爲賓主禮俾同道生師事城南聞人先生逮今粗知學而不陷於小人之域者皆公賜也濂旣往哭公會未幾何又哭道生焉雖石人尤當墮淚近抱疚在席閒中夜尤念公父子不能置起篝火濡毫申之以辭辭曰
番番良士僅以教施才不盡展人期有兒兒今死矣吁其悲

哭王架閣辭

王君樞字德潤濟寧金鄉人祖仁義烏丞父端栗水州稅務大使母劉氏君少警敏人物又魁傑嘗掀髯自咤曰王樞不尋功名功名當自來逼王樞爾豈有

雖在布囊而末不見者耶遂學治經試進士不中卽棄去攻法家書爲衢處二
 府吏尋補書吏浙東廉訪使者府遷浙西名上江南行御史臺辟察院書吏已
 而貢入中臺察院出調浙西道肅政廉訪司照磨兼承發架閣俾贊憲政人器
 其材因會酒言忤御史銜之以事中君下符逮就吏君坐樓上歎曰男子頭可
 斫膝不可屈死則死肯與獄吏對乎遂拔刃自剄左右急救君已仆地血滂然
 流君妻劉及子僧僧忍泣具棺斂載入金華卽城北五里藏焉蓋君自幼寓金
 華又以女妻縣人江演兵起山東道絕不能歸故君喪來葬而妻子皆來依江
 初余入郡從聞人先生學君同日至與之語又知同庚戌生人相驩也晝摩切
 經藝晚則捉手同游衍或縱談大噱憤墮地弗顧或聯詩纔脫口卽促繼之遲
 則罰昏鼓動槩槩始歸日以爲常一旦去爲吏余遂不以書記通有自浙水西
 至者出君手書相勞苦且曰吾薦子於方嶽大臣行授子校官矣子能爲我一
 出乎余以書謝復固辭居亡何聞君死矣余之辭君者非托此以爲名高竊自
 念貧賤士何往不自得君固不忘故人余足一動人必病余以爲挾且私是以
 弗能往視君俟君他日歸休御款段馬候君青霞白水閒未晚也嗚呼孰知君
 之遽去余而死矣乎使知君之遽死也縱百千其口以爲私以爲挾朝夕迭提
 余耳而噪之余尙何恤必能謁君虎林之上矣今復何言哉今復何言哉君旣
 不可見乃絮酒裹雞走哭君之墓僧僧知余至哭迎於途僊然也余心益百折

不自勝造爲哀辭一通以洩余情雖然余情其得而盡洩乎君卒時年四十七至正甲申九月十二日云辭曰

犧尊青黃嘉木之災樗大蔽牛不以爲材使君非材行己昧昧過者弗睨孰得而害君旣材矣人誰舍旃高位疾顛理之必然氓之蚩蚩匪材曷治君仕則當不仕無義孰不顯融君闕而凶豈仕之尤祇繫其逢所逢者時固有通塞亦命使之君復何惑物忌太剛不缺則刳自君取之命復何云君若居柔觸物惟忍非惟保名身何能殞從古有言柔則詭隨縱生千齡非君所宜君死雖亟君膝不屈君氣凜然千古莫奪人孰不死君死則寧尙可謂君鴻毛之輕君何用哀我哀有以天方壽君君則自死我苟無罪誰敢死余一朝之忿惜不爾思妻子煢煢東西顛沛君在九泉亦將自悔我則深悲豈直悲法之隳法旣隳矣君宜長逝彼多斯冠天亦不畏

悲海東辭

玉山鄭先生原善字復初延祐名進士起家德興丞轉處州錄事有異政爲衆所忌遭誣構去官尋以疾卒臨川危君太樸病執法者不得其平爲著悲海東辭濂亦繼作時元統癸酉冬十月丁亥也

我悲海東我涕拭矣善人云瘁邦其棘矣倬彼昊天冒此下民彰善癉惡胡莫之懲冥冥其晝不見出日飄飄兩風墮我家室家室墮止邦國危止豈遽危之

遠將自邇大君維河冢宰維舟卿士維楫烝庶維徒上下相力厥載孔速苟不
是念不勝則覆維彼哲人化爲螟螣維彼愚人猶如鬼蜮鬼蜮戢戢巧爲我賊
螟螣僥僥蝕我黍苗我民我牧唯恐傷只彼豺伊兕敢爲民瘠旣啜其育復鹽
其髓我寘我法孰云能已淑爾君子繡衣孔揚有瑯蔥珩有節斯煌不我能勸
覆謂我爽詈我繫我絕不畏明譬彼鸞鳳見藻是食有振者麟邪蒿爲室式紛
式錯動罔不忒嗚呼昊天曷其有極牲牲其鹿乃索之江中林喬喬乃求其魴
顛倒眩瞽以逞無良嗚呼昊天曷其有常無然惛亂無然惛淫無然回邇以虹
我心爾之悖矣民胥害矣爾之迪矣民相憐矣勿曰丘陵崇不可夷勿曰淵冰
堅不可摧忽爲平陸忽若流澌誰與爾謀曾不爾思謂爾醉止黝然無知爾不
用酒何德之違謂爾蠱止上下卒迷日用飲食不愆厥初其止蘧蘧其行踽踽
其慘咄咄其威虺虺我淚旣竭繼之以血百海其深莫喻我心我生不辰伊誰
之云無越我牆我垣我藩無菜我田我田我麋天命有定我將我怨爾無人怨
我爾用歆乃墳乃麓乃琴乃瑟乃磬乃笙以樂其音以樂其音實獲我心峨峨
墮山山則有樗彼灌者淵淵則有魚匪今獨然振古如茲我苟不樂不樂奚爲

雜傳九首 有序

娶爲浙水東大郡自昔人物多出其中載諸史冊者旣或謬誤而不載者又
將湮沒無聞濂竊病之欲分道學忠義孝友政事文學卓行隱逸貞節八類

作先民傳以示鄉之來學在苒沈疴竟不能遂志近幸少瘳因自劉滂而下得九人皆史官之所略者謾敘其大概而附以贊辭俾侍史錄寘別稿俟他日書成却隨類以附入焉傳直書名而不諱者蓋史法當爾也

劉滂傳

劉滂字德霖武義人滂自少誦說能屈其師與浦江梅執禮同游學人士多傾下之號東梅西劉中大觀己丑進士第調新昌縣令縣在豫章山中俗嗜鬪令到官輒移病去以他吏攝之滂臨以誠未幾稱治雖傍邑訟不能決者乞從滂決之豪鄒氏橫里中挾貴嫫誣人死滂捕致械治之部使者爲請不聽卒傳以法投豪於相州蔡京與滂祖爲布衣交滂至京師京曰吾故人有孫耶除詳定勅令所刪定官欲挽滂爲黨會常璠書詩屏閒京疑其訕己屬滂求其迹且遷官滂笑曰此胡爲及我哉京聞之不悅滂亦拂衣去坐是不調者十餘年靖康初詔除太常博士不拜建炎中上問人才於近臣學士詹義給事中汪藻舍人李公彥皆云滂可用用滂知建昌軍建昌舊守多懦夫威權不立兵習悍驕邀求無度滂至一以法繩之兵不勝其忿持戟入市掠人物卽拒者刺傷之滂捕係追償兵遂爲變滂及母妻皆死時紹興甲寅七月三日也滂卒時年五十六其妻湯氏侍姑側兵及身猶不去竟遇害建昌人聞滂死皆慟哭失聲踰期父老猶會佛祠哭之有欲絕者且千里以書弔其孤朝廷旣誅始亂者復用御史

言褒滂爲朝請大夫官其一子墉滂好學善屬文與人交終始如一聞有急傾財赴之居官嫉惡如仇毅然不可回奪以及於難云

贊曰劉氏初居七閩五代之季有汝明者遷永嘉之荆溪生四子焉孟與仲隨父居季移三衢幼曰器來徙武義滂之六世祖也荆溪之顯者則太常少卿安節給事中安上入河南從伊川程頤游所學甚粹人稱二劉先生武義之顯者世有其人其登進士第則自滂始而通判楚州嘉成甌寧宰三傑繼之後來者復接踵而起多以善政聞歲時燕饗軒蓋繽紛青紫閒錯當時以爲盛事然君子之論則在彼而不在此也

鞏豐傳

鞏豐字仲至其家鄆之濱城渡江卽所寓土斷爲武義人曾祖肅祖庭芝皆左承議郎庭芝世號山堂先生者也父瀟鄉貢進士前此科目相傳七世矣豐學敏而早成自童丱時前輩源緒古今音節事之因革總統如注水千丈之壑迎前隨後宿艾駭服以爲積數十年燈火勤力聚數十家師友講明猶不能到也時新迪義理之學草茅士震於見聞多矜露忤狂至他文史言論儒之藝業又昧陋慎倒莫知幅程獨豐抑縱開闔條疏品彙應變不迫富若素有著之於文無險怪華巧而以理屈人片辭半牘皆清朗得言外趣尤工爲詩多至三千餘首淳熙辛丑以太學上舍對策高第教授漢陽軍代還舊比皆自學入館有不

善之者讒授江東提刑司幹辦公事遭母喪免又授浙東會改法本路人不許爲監司屬官遷幹辦福建帥司公事以格知臨安縣政尙寬簡吏民信化刑罰衰息會其友爲學官豐勸拔滯淹士坐此食宮觀祿久之始提轄左藏庫復以宮觀罷已而又授宮觀而豐死矣嘉定丁丑正月晦日也年七十豐旣挾奇才人謂宜居館閣中祕不應徘徊下列日望其升益顛仆不起故聞其死多傷之而龍泉葉適痛之尤深豐性質易無岸谷然有以自負命雲侶月跨越汗漫浩乎不可挽暇日輒載一壺獨行田野不問歧路抵暮而返去家二里有龍門峽登眺徜徉慨然曰此可以止矣仕雖不顯無幾微見於顏面云子二人積耕皆爲儒

贊曰武義之有輦氏自庭芝始初庭芝登元城劉安世之門以道學爲東平倡弟子受業者恆數百人及其來遷也以所學化導如東平故武義人士知尙義理之學亦自庭芝始至豐又從東萊呂祖謙游於是中原文獻麗澤淵源萃於一門矣嗚呼懿哉

葉秀發傳

葉秀發字茂叔其先由括徙金華爲金華人秀發師事呂祖謙唐仲友極深性理之學以餘力爲文輒擢慶元丙辰進士第弟子慕之從其學者歲至數百人初授福州長溪簿丁父憂而歸服除轉慶元府學教授秀發嘗著論語講義發

越新意以誨諸弟子且曰聖門授業之源無過此書然義理無窮倘一切沿襲舊說吾心終無所得若欲見諸行事是猶假他人之器以爲用用之於己且惴惴焉不以爲便況欲假人乎哉時鉅儒樓鑰史彌鞏婁昉鄭性之楊蘭袁燮皆器秀發與之交而於蘭問難尤切每至日昃忘食蘭自謂有所啓發得邊簪顧葉四子爲喜葉蓋指秀發也秩滿關陞循從政郎建寧府政和令丁母憂服闋調安慶府桐城丞金人犯蘄黃二州桐城爲鄰壤萬目睽睽不相保騎兵將迫家人號泣求避秀發叱之曰此正臣子竭力致身之日雖死何憾苟先去之如一邑生聚何修城浚濠日爲備禦計會金人使諜者至秀發擒之亟斬於城門以徇金人計沮不得近邑賴以完事定制閫忌其功不自己出上其擅斬非法降迪功郎未幾再敘改合入官授宣教郎知徽州休寧縣俄以前事論奪秀發退居餘十年無一毫觖望意獨憤李誠之之冤上書頌於朝初誠之守蘄斬陷一城士卒皆戰死無降者誠之亦望闕再拜拔劍自剄議者不錄其忠反咎其不能全人故秀發不平而訟之言辭明烈聞者降歎史彌遠當國人有自桐城來者彌遠以秀發事爲問其人歷言撫綏安定之詳且謂某等得保首領至今皆葉桐城之賜不然已無桐城久矣彌遠領之從容問參知政事宣繒其言同彌遠歎曰幾失賢矣卽日起發擢知真州楊子縣轉奉議郎差監都進奏院越七日命知高郵軍高郵爲淮東緊治時尙繹騷弗寧秀發上五策一曰防海道

二曰審邊城三曰擇武守四曰練軍實五曰畜財用而以正人心作士氣爲之本言多聽高沙三十六湖水高而田下隄防不固則千里一壑民且無稼秀發建石埭以疏水勢濬洩有恆無乾溢之病其後馬光祖來爲守行埭上思秀發功構堂樊梁之隄以祠焉尋轉承議郎疾作上書乞致事特陞朝奉郎已而疾甚力劾去貪墨吏人勸其何自苦如此秀發曰不可吾死後彼必殘吾民以逞同列來問疾整襟對坐惓惓以究心邊事爲祝無他言其忠義出於天性至死不變如此紹定庚寅九月卒年七十卒之日唯遺書籍數篋敝衣一襲至無以爲斂當屬纊時民夢秀發擁高牙大纛入嶽祠民疑其爲神遂肖像而祠其中云秀發夷險一節臨事唯可以義動不可以勢利劫澤物之念則若飢渴然居田里日有犯私鑄者縣令趙善琛欲重其刑而連坐之秀發曰刑一成而不變君子所盡心焉縱姦固失傷善亦豈爲得哉善琛爲之止有悍戾者曰嗜鬪富人嫉之欲以嘯聚之名寘於法秀發白於郡守鄭如剛曰血氣之爭則有之嘯聚則未之聞也民因得不死秀發卒後累贈朝議大夫學者尊之曰南坡先生所著書有易說周禮說論語講義及詩文行於世子夢擇孫振祖皆出仕能以清白世其家云

贊曰濂嘗讀國學進士王若訥記秀發桐城斬諫事未嘗不流涕而歎也當金人陷斬士大夫析圭儋爵者或納款賣降之不暇有若秀發者官僅一丞耳則

不顧妻子嬰城固守法宜在所褒嘉顧以擅斬而罪之果何道耶譬有丈夫焉居深山中盜欲舞刀劍奪其財先遣游偵以察虛實其隸怒殺偵者丈夫乃不責盜而責隸可乎不可也國之政如此將何以致乎治耶宋自是而微矣嗚呼自古當季世變白爲黑倒上爲下若斯之類甚衆人所不能堪而秀發安之抑賢矣哉

喻偁傳

喻偁字伯經義烏人其從祖良能與兄良倚同入太學又同登紹興丁丑進士第其季良弼亦太學生晚以特科補新喻尉皆以文學稱而良能最知名偁早從良弼學繼受經於永康陳亮復由太學諸生登慶元己未進士第調宣城尉有境外盜狙入尉界內偁登執之歸於府府帥臣邱密異之乃立所由尉庭下曰盜逃出境尉不執闌入境他尉乃執邪所由尉震恐開禧丙寅金人犯淮府檄令尉二人餉軍由歷陽達鍾離鍾離乃敵衝要法當以重兵護糧護不滿千人令畏縮不敢前偁奮不顧難諭鄉長老召募足千數卽行道經含山有敗兵回揚言於衆曰我曹潰矣將以糧資敵乎弗去懼殲耳民愕視亡策將逃偁曰事急矣乃命弓率執大斧而前曰設遇敵尉必先死職也終不負國汝未必死乃資尉耶欲去視吾斧民不敢動卒致饋於濠糧有羨衆謂尉宜得偁悉歸於公府遷慶元府觀察推官丁父憂不赴調隆興府觀察推官真德秀來爲帥素

知侂能文見侂與屬吏迎道左爲之改容思論薦之未薦德秀去侂乃以選人爲宜春丞宜春地接贛吉吏珥筆成風民善訟侂爲人怵怵諒直聽必以情民退無後言凡訴臺部者必曰得宜春丞一聽死無憾居久之由承直郎改奉議郎僉書鎮南軍節度判官聽公事改章服尋陞朝奉郎初侂久從諸老游幕中多新進少年議論雅不合侂歎曰吾髮已種種寧能與翩翩小兒較短長哉遂請祠而歸築室夫人峯下曰蘆隱若將終焉嘉熙丁酉九月年八十四卒子二人宣子武子侂性豪談論今古輒目光如注氣軒軒出鼻咤閱人莫能抗尤長於文辭通直郎杜游嘗稱之曰質而不俚華而不靡憤而不激怒而不懟不以食膾炙爲美澹乎其有味不以刺文繡爲工黯乎其有光其感時念故推物類情抑揚離合必窮其源以揚其波其不合於律者鮮矣君子以爲知言當乾道淳熙閒朱熹呂祖謙陸九淵張栻四君子皆談性命而闢功利學者各守其師說截然不可犯陳亮侂起其傍獨以爲不然且謂性命之微子貢不得而聞吾夫子之所罕言後生小子與之談之不置殆多乎哉禹無功何以成六府乾無利無以具四德如之何其可廢也於是推尋孔孟之志六經之旨諸子百家分析聚散之故然後知聖賢經理世故與三才並立而不廢者皆皇帝王霸之大略明白簡大坦然易行人多疑其說而未信侂獨出爲諸生倡布礫網紀發爲詞章扶持而左右之使亮之門惡聲不入於耳高名出諸老上皆侂之功也已

而亮爲世議所扼當路必欲擠之死地凡再下詔獄俛與同志生極力營解幾陷羅織遂脫亮於萬死一生之中亮顧俛曰此生死而肉骨也人多義之俛所著有隨見類錄二百卷蘆隱類藁五十卷首論六經之功用云從弟南強

南強字伯強自幼負奇氣父直方以與陳亮類俛從之游時著錄牒者歲數千百人南強周旋其閒獨能探深索隱語移日精銳鋒起亮曰喻伯強文墨翰議凜然可畏也慶元乙卯戊午連貢於鄉未幾入太學中監舉月書率占前列上禮部皆不得第嘉定庚辰俛奉南廊對授邊功部臨安府富陽縣尉轉脩職郎南強創射樓補闕卒額時其練習春秋則都肄府中徽幟精明行列整肅屢出他縣上縣民譚甲與邱乙閔譚女以癩死誣邱驚跌所致挾王丙爲左縣以命南強南強召譚與王列於庭且詰譚曰汝以癩死女誣人汝不吐實將坐汝譚色動顧謂王曰汝嗾我也亟袖案白上言抵譚罪境內多盜販舳艫尾相銜不絕徼卒與豪猾爲市弗可敗南強一切禁捕雖犯權勢貽怨讎弗懼也寶慶初禮部侍郎真德秀以言事去廟堂風京尹跡其所至欲并以爲罪德秀舟過富春江南強亟見且賦詩爲餞人皆壯之轉承直郎處州縉雲丞未上紹定庚寅三月卒年七十一南強讀書不爲口耳學必欲見之實踐每至名義可喜事擊節慷慨謂戾契可致初當路欲排善類指陳亮爲根煨煉刺骨罪且不測門人畏其威焰噤不敢出聲南強義形辭色貽書誚責言先生無辜受罪將賣恨入

士吾曹爲弟子當怒髮衝冠乃影響昧昧是得爲士類耶復走東甌見葉適備陳寃狀適曰子真義士也卽秉燭爲作書數通南強又持走越袖見諸臺官誦言無忌卒直亮之寃南強爲人不立崖岸而見義勇爲聞朝廷行一善政輒昂首吐氣或有司苛虐彈指長吁終日不樂暇時旅肴設醴與賓友握手劇談日至再三不倦爲文善馳騁下筆輒數千言不繩削而自合大篇短章恣人取去往往不甚愛惜惟梅隱筆談十四卷尙存子二厚祖埜業進士贊曰自道廢民散師弟子之義缺平居則繆爲恭敬視其影或不敢踐一逢患難輒反目若不相識然甚者至更名他師使偁與南強見之必將唾去之矣傳曰民生於三事之如一唯其所在則致死焉其偁南強之謂乎

樓大年傳

樓大年字元齡義烏竹山里人父伯寬由太學入官授江陰縣尉轉知無爲軍襄安鎮以終大年從鄉先生徐僑游僑實朱熹弟子故大年長於性命之學登嘉定癸未進士第調迪功郎池州青陽縣尉丁內外艱服除監嘉興府袁部鹽場尋知嘉興青龍鎮該慶壽恩循從事郎嚴州遂安縣令差兩浙西路提刑司幹辦公事兩易監行在會子庫同列以侵欺被劾唯大年獨免改宣教郎知隆興府南昌縣爲治先教化建利去病若嗜欲然縣民夜行爲讎家毆死事覺賂其甥來就辟甥自陳殺民狀甚悉大年疑之亟命丞往驗丞受賕使焚屍以滅

迹大年怒聞於府屬錄事覆實錄事復受賕如丞大年正色抗辨錄事爲引去上之憲臺令觀察推官重讞事始白民敬之生爲立祠遷奉議郎通判吉州提點刑獄李迪以大年廉慎命錄一道滯囚大年隨重輕而疏裁之抱成案就迪言咸聽未幾攝郡事江東大姓查氏以父遺書據幼弟資產幾六十萬第長訴之縣州歷二十年不解迪曰非清白吏如大年者不足以究此以其事下大年舉張詠決子壻爭財故事爲例命歸其弟人以爲允歲終吏以公帑錢粟羨餘來白曰此公券內物前官具有例大年斥之以助軍餉及周宗室之難厄者皆舉手加額而退換承議郎提領戶部牘賞所主管文字尋陞朝奉郎寶祐甲寅三月卒於官年七十子一人三畏大年襟度灑落如晴空皎月一塵不染然在官洞察民隱脫有理未安者必反覆沈思終夜不寐所見一定屹如砥柱不移雖壓以權貴人之勢弗回也及解印綬去攀轅臥轍者綿亙十餘里或者以爲無愧古循吏云初理宗降訓廉謹刑二詔大年撫古之可法戒者二百事疏之號銘心偶錄藏於家

贊曰濂嘗過竹山問大年子孫無恙獲拜其遺像癯然一儒者爾而其剛烈之氣則常信於萬物之上人果可以貌取之哉自夫道學不明士喪其所守雖以魁梧奇偉之夫考其行事脂韋自媚如女婦之留髯鬣也其視大年何如哉大年受學徐僑與聞濂洛關閩之學其所養充矣此所以竄然獨異也學之所繫